



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-1024/02
Sarajevo, 04. oktobra 2002.

Z A P I S N I K

sa 32. sjednice Predstavničkog doma Parlamentarne skupštine Bosne i Hercegovine,
održane 04. oktobra 2002. godine

Trideset druga sjednica Doma sazvana je za 01. oktobar 2002. godine, nakon što je njeno održavanje bilo odgođeno sa 24. septembra na zahtjev klubova poslanik PDP-SNS-SNSD-SPRS i SDS-a. Međutim, sjednica nije održana ni 1. oktobra zbog nedostatka kvoruma iz entiteta Republike Srpske – odsustvovali su poslanici klubova PDP-SNS-SDS-SPRS i SDS-a . Poslanici Mirko Banjac i Hilmo Neimarlija opravdali su izostanak. Također su odsustvovali i poslanici Kluba HDU – koji su tražili da se sjednica odgodi za 04. oktobar.

Sjednica 4. oktobra je počela s radom u 11,25 sati. Prisustvovalo je 39 poslanika. Odsustvovali su Mirko Banjac, Mirko Mijatović i Ivo Lozančić.

Pored poslanika sjednici su prisustvovali predsjedavajući Vijeća ministara Dragan Mikerević, ministar Svetozar Mihajlović, Krešimir Zubak i Ante Domazet, te zamjenici ministara Kadrija Haračić – Šabić i Milan Lovrić. Također su sjednici prisustvovali i predstavnici OHR-a, OSCE-a, te američke i rumunske ambasade.

Na početku sjednice predsjedavajući Doma Mariofil Ljubić upoznao je poslanike o razlozima odgađanja sjednice od 24. septembra za 1. oktobar. Istakao je da je bilo potrebe da se ova sjednica ipak održi, jer ima nekoliko zakona i pitanja koja se moraju okončati u ovom mandatu. Upoznao je poslanike da je od Republičke izborne komisije zatražio stav o održavanju sjednice na dan predizborne šutnje, na šta je iz Komisije odgovoreno da nema smetnji za održavanje sjednice. Potom je predsjedavajući predložio neophodne tačke dnevnog reda koje su usaglašene na Proširenom kolegiju, a to su:

1. Zapisnik sa 31. sjednice Predstavničkog doma,
2. Izvještaj Zajedničke komisije o postizanju sporazuma o jedinstvenom tekstu Zakona o veterinarstvu u Bosni i Hercegovini,
3. Davanje saglasnosti za ratifikaciju:
 - a) Razvojnog kreditnog sporazuma (Projekat upravljanja krutim otpadom) između Bosne i Hercegovine i International Development Asociation (Međunarodne asocijacije za razvoj),
 - b) Međunarodne konvencije o zaštiti bilja.

U dnevni red je predsjedavajući Doma predložio i Zahtjev Vijeća ministara za razmatranje Prijedloga zakona o izmjenama Zakona o državljanstvu Bosne i Hercegovine po hitnom postupku (član 105. Poslovnika), jer je kao predsjedavajući to bio obavezan učiniti po članu 105. Poslovnika.

U diskusiji o prijedlogu dnevnog reda učestvovali su:

Bogić Bogićević – u ime Kluba poslanika predložio da se u dnevni red uvrsti Prijedlog zakona o visokom sudskom i tužilačkom savjetu.

Osman Brka – predložio da se u dnevni red uvrsti Izvještaj Komisije za ljudska prava, imigraciju, izbjeglice i azil o posjetama jednom broju kazneno-popravnih ustanova.

Željko Bilbija – u ime Kluba poslanika iznio je stav da danas ne bi trebalo razmatrati Zahtjev Vijeća ministara da se po hitnom postupku razmatra Prijedlog zakona o izmjenama Zakona o državljanstvu BiH, kao ni Prijedlog zakona o Visokom sudskom i tužilačkom savjetu, jer isti ne bi bili konačno usvojeni s obzirom da ih nije usvojio ni Dom naroda.

Dragan Mikerević, predsjedavajući Vijeća ministara, predložio je da se u dnevni red sjednice uvrsti Prijedlog odluke o imenovanju članova Državne regulatorne komisije za električnu inergiju.

Miloš Jovanović – obavijestio je Dom da će danas glasati protiv svih prijedloga koji dolaze od Vijeća ministara, zbog neodgovornosti Vijeća ministara prema odgovorima na poslanička pitanja.

Adem Borić je predložio da predsjedavajući Doma Mariofil Ljubić u ime Doma uputi čestitku odbojkašima BiH na osvojenom prvom mjestu u sjedećoj odbojci.

Predsjedavajući Ljubić se zahvalio Ademu Boriću na prijedlogu i rekao da će u ime Predstavničkog doma uputiti čestitku odbojkašima. Zatim je zaključio raspravu o prijedlogu dnevnog reda i pozvao Dom da se o prijedlozima izjasni.

Željko Bilbija je u ime Kluba zatražio pauzu prije izjašnjavanja o prijedlozima za dopunu dnevnog reda.

Poslije pauze Dom se prvo izjasnio o prijedlozima za dopunu dnevnog reda.

Prijedlog Bogića Bogićevića – da se u dnevni red uvrsti Prijedlog zakona o Visokom sudskom i tužilačkom savjetu nije dobio entitetsku većinu. Od 35 prisutnih ZA je glasalo 25, protiv 1, suzdržalo se 9 poslanika. Po entitetima, iz FBiH ZA su glasala 22, iz Republike Srpske 3 poslanika.

Prijedlog Osmana Brke – da se u dnevni red uvrsti Izvještaj Komisije o posjetama jednom broju kazneno – popravnih ustanova, također nije dobio entitetsku većinu. Od 37 prisutnih, ZA je glasalo 26, suzdržalo se 11 poslanika. Po entitetima, iz RS ZA glasala 3, iz FBiH 23 poslanika.

Ni prijedlog predsjedavajućeg Vijeća ministara nije dobio entitetsku većinu. ZA su glasala 24, protiv 1, suzdržalo se 11 poslanika – FBiH ZA 22, iz RS 3 poslanika.

Dom nije usvojio ni prijedlog predsjedavajućeg Mariofila Ljubića da se razmatra Zahtjev Vijeća ministara za razmatranje Prijedloga zakona o izmjeni Zakona o državljanstvu BiH po hitnom postupku, u skladu s članom 105. Poslovnika.

Poslije glasanja o svim prijedlozima predsjedavajući je konstatovao da je za 32. sjednicu usvojen sljedeći

DNEVNI RED:

1. Zapisnik sa 31. sjednice Predstavničkog doma,
2. Izvještaj Zajedničke komisije o postizanju sporazuma o jedinstvenom tekstu Zakona o veterinarstvu u Bosni i Hercegovini,
3. Davanje saglasnosti za ratifikaciju:
 - a) Razvojnog kreditnog sporazuma (Projekat upravljanja krutim otpadom) između Bosne i Hercegovine i International Development Asociation (Međunarodne asocijacije za razvoj),
 - b) Međunarodne konvencije o zaštiti bilja.

Ad – 1: Zapisnik sa 31. sjednice Predstavničkog doma

O zapisniku nije bilo diskusije. Zapisnik s 31. sjednice usvojen je jednoglasno – sa 39 prisutnih poslanika.

Ad – 2: Izvještaj Zajedničke komisije o postizanju sporazuma o jedinstvenom tekstu Zakona o veterinarstvu u Bosni i Hercegovini

Predsjedavajući Ljubić je podsjetio poslanike da je Zajednička komisija postigla sporazum o jedinstvenom tekstu Zakona o veterinarstvu, pa je Izvještaj komisije dao na glasanje.

Izvještaj Komisije usvojen je jednoglasno. Predsjedavajući je konstatovao da je ovim zakonom o veterinarstvu u Bosni i Hercegovini i konačno usvojen u Parlamentarnoj skupštini.

Ad – 3: Davanje saglasnosti za ratifikaciju

Predstavnički dom je jednoglasno dao saglasnost za ratifikaciju:

- a) Razvojnog kreditnog sporazuma (Projekat upravljanja krutim otpadom) između Bosne i Hercegovine i International Development Asociation (Međunarodne asocijacije za razvoj),
- b) Međunarodne konvencije o zaštiti bilja.

Na kraju sjednice predsjedavajući Mariofil Ljubić zahvalio se svim poslanicima na njihovom zalaganju i trudu da pomognu da Predstavnički dom u ovom mandatu bude najčvršća karika u lancu institucija Bosne i Hercegovine, izrazivši mišljenje da je Dom ipak dosta uradio. Rekao je da je dosta posla Dom i započeo i da očekuje da će taj posao naredni saziv nastaviti.

Predsjedavajući se zahvalio na saradnji i članovima Predsjedništva i Vijeća ministara Bosne i Hercegovine.

Sjednica je s radom završila u 12,40 sati.

Sastavni dio ovog zapisnika je transkript 32. sjednice Predstavničkog doma.

S E K R E T A R
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Mariofil Ljubić